



**Peserta Empower ECER** diberi peluang berniaga bersempena dengan Expoconvo UMP di kampus Gambang.

## UMP bantu peniaga promosi produk

**Gambang:** Karnival Expoconvo bersempena dengan Majlis Konvokesyen Universiti Malaysia Pahang (UMP) baru-baru ini memberi peluang kepada peserta Empower Wilayah Ekonomi Pantai Timur (ECER) untuk mempromosi produk mereka kepada masyarakat.

Antaranya, peserta program jahitan, Norziyana Abdullah, 45, yang meraih pengalaman julung kali berniaga di tapak ekspo dengan menjual tudung, pakaian dan aksesori wanita.

"Saya sudah lama meminati bidang jahitan tetapi tidak berpeluang menghadiri kelas jahitan kerana kadar bayaran kursus yang tinggi.

"Hasrat itu akhirnya tercapai apabila terpilih mengikuti kursus Jahitan anjuran UMP dengan kerjasama Empower ECER pada tahun lalu hingga dapat menghasilkan produk untuk dipasarkan termasuk baju kurung dan tudung," katanya.

Siti Noratikah Mohamad, 27, pula membuka gerai menjual aksesori telefon bimbit dan menyediakan kemuda-

han memperbaiki telefon bimbit.

### Telefon bimbit

Beliau menjadi peserta Empower ECER sejak tiga tahun lalu dan kini memiliki sebuah kedai telefon bimbit di Jaya Gading, Kuantan, Pahang.

"UMP dan ECER banyak membantu menyediakan peluang pemasaran dan memantau perkembangan peserta, malah turut dibantu dalam aspek keperluan peralatan," katanya.

Sementara itu, pengarah projek Empower ECER UMP, Zainal Bahari berkata, peluang berniaga kecil-kecilan bersempena dengan Expoconvo memberi peluang kepada peserta Empower ECER untuk menimba pengalaman serta menjadi wadah bagi peserta membina rangkaian.

"Mereka boleh mengenali secara dekat mengenai peluang yang ada dan menjalin rangkaian perniagaan dengan peniaga lain. Malah, langkah itu boleh memberi pulangan yang cukup baik kepada peniaga jika diusahakan dengan ber-sungguh-sungguh," katanya.



Peluang berniaga dapat menjadi wadah kepada peserta untuk membina rangkaian.